

lis Gnovis

■ UDIN. Memorie di ducj i deparatâts

La clape dai ex deparatâts tai «Lager» naziscj, «Aned», sabide ai 26 di Zenâr, e à programât une celebrazion publiche, li dal monument che a Udin al onore ducj i deparatâts dal Friûl, di chê strade de «Zornade da la Memorie». La comemorazion e tacarà a 11.15, devant dal grant clapon puartât te strade «della Vittoria» dal «Lager» austriac di Mauthausen. Daspò dai salûts dai soestants e dal president de sezion «Aned» di Udin, Marco Balestra, al intervignarà il sot president, Antonio De Lucia.

■ PARÏS. I Furlans di Père Lachaise

Il Consolât gjenerâl talian a Parîs, parie cul «Comites», al à inviât il projet «L'Italia del Père Lachaise» (progetto.perelachaise@gmail.com), cul fin di presentâ, intun libri, i passe 50 talians plui innomenâts che a polsin tal cimitieri monumentâl de capital francese. Fra lôr, a son bielzà stâts notâts i furlans Giandomenico Facchina, Antonio Franconi e Pietro Savognan di Brazzà. I promotôrs ur domandin une contribuzion a ducj chei che a intindin di prudelâ la operazion, che la prime presentazion e je stude programade ai 13 di Zenâr, intant di une visite guidade a «Père Lachaise».

■ PORDENON. Sport paraolimpic par ducj

Tal Friûl occidentâl, e je partide une campagne speciâl pe promozion de ativitat sportive des personis pidimentadis. La direzion sociâl e sanitarie de Aziende sanitarie numar 5 e à firmât une convenzion cul Comitât talian paraolimpic par permeti di inmaneâ ativitâts cun istrutôrs e tecnics cualificâts ator pal teritori e di vierzi un ufici informatif cun personal specializât (www.cipfriulivg.it/showquestion.php?faq=54&fldAuto=3633). L'ufici al funzionarà dongje dai ambients dal «Urp» de Aziende, tal ingrès di strade «della Vecchia Ceramica», a Pordenon, il secont miercus di ogni mès, di 10 fin sul misdi.

■ TUMIEÇ. Cors di furlan

Il cjantant Luigi Maieron, martars ai 29 di Zenâr, al scree a Tumieç il «Cors pratic di lenghe e di culture furlane», par cure de «Societât Filologjiche Furlane». La inaugurazion e je stabilide a 18, li de Sale polifunzionâl di strade De Marchi. Lis lezions a tacaran ai 31 di Zenâr e a saran proponudis ogni joibe, a 20, li de Sale multimediâl di palaç Frisacco, par cure dal professôr Enrico Radivo. La iniziative e je prudelade dai Comuns di Cjavaç, di Damâr, di Tumieç e di Verzegnis, dulà che si pues dâsi in note (par informazions: 0433 487460).

■ UDIN. Culture e teritori

Si varà timp fintremai ai 31 di Lui par presentâ tant i scrits che i materiâi multimediâi destinâts pal «Premi Andreina e Luigi Ciceri», rivât a la XIX edizion. I lavôrs a varan di profondi «aspjets de culture e dal teritori dal Friûl» mediant di saçs libars, tesis di laureade magjistrâl e di dottorât o ben mediant di documentaris, filmâts e struments interatîfs. Il model par domandâ la amission al concurs si pues burîlu fûr tal lûc internet de «Filologjiche» (www.filologicafriulana.it).

Joibe 17	S. Antoni abât	Lunis 21	S. Gnese
Vinars 18	S. Margarite de Ungarie	Martars 22	S. Vincenç
Sabide 19	Ss. Mario e C. martars	Miercus 23	S. Clement martar
Domenie 20	Ss. Fabian e Bastian	Il timp	Aiars un poc plui clips



Il soreli
Ai 16 al iève aes 7.40
e al va a mont aes 16.59.



La lune
Ai 21 Lune plene.

Il proverbi
La femine e ten sù trê cjantons
de cjase, l'om un sòl.

Lis voris dal mès
Viodêt dai vuestris pomârs.
Gjavatit la nêf dai ramaçs.

Colonos, feminis «In file»

Ai 18 di Zenâr si scree a Vilecjasse la rassegne pal Invier dal 2019

Cuntune serade «par ricuardâns che cence lis feminis la nestre libertât e cussience di furlans no sarès chê stesse», vinars ai 18 di Zenâr, la clape culturâl «Colonos» e scree «In file 2019». Dute la rassegne culturâl dal Invier, inmaneade li dal Agriturisim di Vilecjasse di Lestize, e sarà dedicade al mont feminin, mediant di un percors dilunc i mès di Zenâr, di Fevrâr e di Març.

In plui des convignis, e sarà proponude une mostre di pituris africanis, imbastide di Angelo Bertani cu lis oparis di Esther Mahlangu.

In face de «crisi da la presince da la femine ta la societât», che e je «crosere di une molteplicitât di problems, ch' a cjapin dentri ançe il sisteme plui gjenerâl da lis relacions umanis e da lis identitâts sociâls», la clape direzude di Federico Rossi, cu la consulente scientifiche di Angelo Floramo, e à «sielzût di dâur vòs, plui che a lis legjittimis rivendicazions dai lôr diris, a lis feminis stessis che cun lis lôr sieltis di vite a son rivadis a sfrancjâsi dal complès di inferioritât sociâl e da la sotanance da la vision maschil o pluitost maschiliste».

«O varin l'ocasion di condividi la testemoneance vive e direte di tantis di lôr – al pant Rossi –, ch' a contaràn l'impegn e la funzion di protagonistis tai diviers cjamps, dal lavôr a la famee, dal inzen imprenditorîal a la creativitat culturâl». La convigne dai 18 di Zenâr, «Ljuba e chês altris. Par une storie feminine dal Friûl», e varà par protagonistis, a 20.30, Angelo Floramo, Erika Artico, Federico Rossi e Aurora Casonato. Domenie ai 27 di Zenâr, l'apontament al è stabilît a 16.30, cuant che Alessandra Aita, Ste-fania De Giusti, Morena Meneghini, Eliana Monego e Caterina Tomasulo (Catine), guidadis di Laura Nicoloso a proponaran lis sôs testimoniancis su la ativitat professionâl e tes



Federico Rossi, diretôr artistic dai «Colonos» e de rassegne culturâl «In file 2019»

La cussience de identitât feminine e lis potenzialitâts dal jessi feminis, pai «Colonos», a son necessariis par dâi une direzion gnove a la societât

relazions. Il titul dal confront al sarà: «Polifemina: voli viert sul mont al feminin».

Giannola, Antonella e Francesca Nonino a saran lis protagonistis de conversazion «Une tribù di feminis», animade di Elisabetta Pozzetto e di Paola Selva, vinars ai 8 di Fevrâr a 20.30.

L'apontament di domenie ai 17 di Fevrâr, che al tacarà a 16.30, al tratarà l'«eroisim quotidian» tal mont dal art. Angelo Bertani, dialogant cun Elisabetta Di Sopra e mostrant i sei videos, al procurarà di palesâ cemût che l'«artiste si esprim mediant dal lengaç video par indagâ lis dinamichis plui sensibilis da la realtât cotidiane».

Il neurosienziât Franco Fabbro, cun Barbara Tomasino, domenie ai 24 di Fevrâr, al presenterà «Il curviel da la femine (e chel dal om)». I doi relatôrs, a 16.30, a saran compagnâts dai violins di Martina Orlando e di Jin Yuxuan. L'ultin apontament di «Feminis», indaûr a 16.30 di domenie, ai 3 di Març, al varà par protagonistis cuatri umign che, daprûf di un «veçjo juke box incolm di cjançons» – guviernât di Si-

mone Ciprian –, a vierzaran «la sò valis folcjade di libris, incolme di debolecis, ideis, domandis, comozions di condidivi, curiositâts di scuvierzi». I animadôrs di «Olsâ. Juke Box leterari» a saran: Angelo Floramo, Paolo Medeossi e Paolo Patui.

Prin de Vierte, i «Colonos» a àn programât, come «event colateral», ançe la presentazion dal libri «O sin dal giat» di William Cisilino. L'apontament al colarà vinars ai 15 di Març, a 20.30.

Mario Zili

Messe par furlan

A Udin, la Messe par furlan e ven cjantade sabide ai 19 di Zenâr, a 18, li de capele de «Puritât» (Radio Spazio le trasmet sul moment). E compagnarà la celebrazion la corâl «Meleretum» di Mereto di Capitulo. Al cjantarà messe pre Bepi Baldàs de Diocesi di Gurize.

Peraulis in dismentie par cure di Mario Martinis

❖ BRENTA

s.f. = bigoncia, brenta, tino per vendemmia e pigiatura; (probabilmente di origine preromana nel significato di «recipiente, contenitore») E je ore di folâ la ue de brenta. È il momento di pigiare l'uva della bigoncia.

❖ BRINCÂ

v. = agguantare, abbrancare (dal veneto o dall'italiano (ab)brancare, derivato da branca «zampa») Lu à brincât e lu à butât par tiere. Lo ha agguantato e lo ha buttato a terra.

❖ BRISCJE

s.f. = carretta lunga e piatta di legno, a quattro ruote, per usi campagnoli (si ipotizza l'influsso francese briska per le varietà dell'italiano, derivate dal russo briska o dal polacco brijczka, a loro volta adattati dall'italiano biroccio, baroccio.) Par puartâ a cjase ducj i raclis cjol la briscje. Per portare a casa tutti quei rami secchi prendi la carretta.

❖ BRESSANE

s.f. = uccellanda con reti (parola di origine lombarda bresàna «bresiana, di Brescia») Ogni Setembar Martin al met lis rêts te bressane. Ogni settembre Martino mette le reti nell'uccellanda.

❖ BROILI

s.m. = brolo, verziere, poderetto annesso alla casa, recintato per lo più da un muro e coltivato a viti, alberi da frutta ed erbaggi (dal latino tardo brögilus «boschetto cinto da siepe») Lâ sù sui arbui dal broili a cjoli lis pomis mi plâs une vore. Salire sugli alberi del podere a cogliere la frutta mi piace tantissimo.

❖ BROSE

s.f. = brina (anche se l'etimologia è discussa, si suppone derivi da una variante *brösj, di base gallica *bruis/brös ma di origine indoeuropea con significato di «incendio; bruciare») Vuê a buinore la plane e slusive di brose. Stamattina la pianura luccava per la brina.